

28 April. 2025.18:15 Hrs

Headlines

- उमर अब्दुल्ला होरें आखेआ ऐ जे कश्मीर च आतंकवाद हुन खात्मे पर श्रीनगर जामिया मस्जिद च 2 मिनटें दा मौन मामूली गल्ल नेई। राज्य दा दर्जा बहाल करने बारै सियासत करने दा एहू समां सेई नेई।
- जम्मू-कश्मीर विधानसभा नै पहलगाम आतंकवादी हमले दी निंदेआ करने बारे इक प्रस्ताव पारित कीता। इस हमले गी घिनौना ते कायराना करार दस्सेआ। सदन नै भारत सरकार दी कारवाइएँ दा समर्थन कीता। राज्यें तें केंद्र शासित प्रदेशें दी सरकारें गी अपील कीती जे ओहू विद्यार्थिओं दी सुरक्षा गी यकीनी करै।
- पहलगाम आतंकवादी हमले दे मद्देनजर रक्षा मंत्री होरें प्रधानमंत्री हुंदे कन्नै मलाटी कीती।
- मौसम विभाग नै अज्जै थवां जम्मू-कश्मीर च लू चलने दी पेशगाई कीती। जम्मू-श्रीनगर राश्ट्रीय जरनैली शिडक इक तरफा आवाजाई लेई खुल्ली, मुगल शिडक पर गड्डिओं दी आवाजाई जारी।

<><><><><><>

CM-Assembly

मुख्यमंत्री उमर अब्दुल्ला होरें विधानसभा गी जानकारी दित्ती जे पहलगाम आतंकवादी हमले मगरा कश्मीर च पैहली बारी आतंकवाद खिलाफ अवाज चुक्की। आकाशवाणी जम्मू संवाददाता दी रिपोर्ट मूजब विधानसभा दे विशेष सत्र गी संबोधित करदे होई मुख्यमंत्री होरें आखेआ जे इस हमले दी सख्त लफ्जें च निंदेआ होआ'रदी ऐ ते लोकें आसेआ दित्ती जा'रदी प्रतिक्रिया आतंकवाद दे खात्मे दी शुरूआत ऐ। उनें आखेआ।

.....

उनें सदन गी जम्मू-कश्मीर दा राज्य दा दर्जा बहाल करने दा पूरा भरोसा दोआया। उनें आखेआ जे अज्जै दा दिन सियासी मंगें आस्तै नेई ऐ।

<><><><><><>

LA-Restoration (Byte)

जम्मू-कश्मीर विधानसभा च हाल च पहलगाम च होए दे आतंकी हमले जेदे च 26 बेदोसे लोक मारे गे हे, दी निंदेआ आहला प्रस्ताव पारित कीता गेआ ते जम्मू-कश्मीर दी तरक्की ते अमन-शांति च विघ्न पाने आहले इनें राष्ट्र विरोधी तत्वे खलाफ दृढता कन्नै लड़ने दा संकल्प लैता। आकाशवाणी दे जम्मू संवाददाता दी जानकारी मूजब उपमुख्यमंत्री सुरिंद्र चौधरी होरें जम्मू-कश्मीर सरकार आसेआ इस प्रस्ताव गी सदन च पेश कीता हा जेदे च आतंकवादियें आसेआ सैलानियें पर कीते गेदे कायराना हमले दी सख्ती कन्नै निंदेआ कीती गेई। इस प्रस्ताव गी सदन च पेश करदे होई उपमुख्यमंत्री सुरिंद्र चौधरी होरें आखेआ।

.....

सत्र दौरान सदन नै केंद्र सरकार आसेआ हाल च लैते गेदे कूटनीतिक फैसलें दा समर्थन कीता ऐ। एहदे अलावा उनें सब्बनें राज्यें ते केंद्र शासित प्रदेशें अगगे अपील कीती ऐ जे कश्मीरी विद्यार्थियें दी सुरक्षा यकीनी बनान। बाद च विधानसभा दी कार्रवाई गी अनमित्थे समें लेई स्थगित करी दित्ता गेआ।

<><><><><><>

Assembly-Homage

जम्मू-कश्मीर विधानसभा नै पहलगाम च पिछले हफ्ते आतंकवादी हमले च मारे गेदे 26 लोकें गी श्रद्धांजलि भेंट करने लेई 2 मिनटें दा मौन रक्खेआ। आकाशवाणी जम्मू संवाददाता दी रिपोर्ट मूजब जम्मू च अज्ज विशेष सत्र लगा। विधानसभा दे स्पीकर अब्दुल रहीम राथर होरें इस हमले दी सख्त लफ्जें च निंदेआ कीती। इस हमले च मुख्य भरै थवां आए दे केई सारे लोक मारे गे हे। उनें मारे गेदे लोकें गी श्रद्धांजलि भेंट कीती ते सौगी परौआरें प्रति अपनी हमदर्दी जाहिर कीती।

<><><><><><>

LoP

विधानसभा च विपक्ष दे नेता सुनील शर्मा होरें अज्ज आखेआ जे प्रधानमंत्री नरेंद्र मोदी पहलगाम आतंकी हमले दा बनकदा परता पक्क गै देडन। उनें आखेआ जे इस हमले दे दोषियें ते साजिशकर्ताएं गी उन्दे अंजाम तगर पजाया

जाग। आकाशवाणी दे जम्मू संवाददाता दी जानकारी मूजब सुनील शर्मा होरें आखेआ जे इस विधानसभा च आखे गेदे इक लफज गी पूरा देस अज्ज बड़े ध्यानै कन्नै सुना'रदा ऐ। इस आतंकी हमले च मारे गेदे बेदौसे लोकें लेई संवेदना प्रगट करदे होई उनें आखेआ जे इस हमले कारण उंदे मनै गी बड़ा मता दुख पुज्जा ऐ। उनें अग्रे आखेआ जे जम्मू-कश्मीर गी धरती पर स्वर्ग आखेआ जंदा ऐ जित्थे आइयै लो अपने समें गी यादगार बनाना चाहंदे न, पर इये नेह दर्दनाक हमले नै पूरी इंसानियत गी हिलाइयै रक्खी दिता ऐ।

<><><><><><>

Dy CM (Byte)

उपमुख्यमंत्री सुरेंद्र चौधरी होरें अज्ज जोर देइयै आखेआ ऐ जे पाकिस्तान गी इस गल्लै पर ध्यान देना लोइचदा जे उसी जम्मू-कश्मीर कोला पिछले 3 दाहकें थमां नाs कोई फायदा पुज्जा ऐ ते ना गै भविक्ख च पुज्जोग। पत्रकारें कन्नै गल्ल करदे होई उपमुख्यमंत्री होरें गलाया जे जानियै-जानियै लगातार दखलंदाजी करियै पाकिस्तान गी कोई फायदा नेई होआ ते नाs गै होग। हाल च गै पहलगाम च होए दे आतंकी हमले पर दुख जाहिर करदे होई आखेआ जे इस कायराणा हमले च आतंकवादियें साहडे परौहने गी नशाना बनाया। उनें गलाया जे एहू बड़ी मंदें भागें आहली गल्ल ऐ जे बेदोसें लोकें अपनी जान मुहाई दिती ते जम्मू-कश्मीर दे लोकें पर एहदा बड़ा माझा असर पेआ ऐ। उनें भरोसा दोआया ऐ जे भविक्ख च इयै नेहा कोई हादसा पेश नेई आवै ते खित्ते च शांति ते रमानदारी बनी दी रवै। एहदे लेई सख्त कार्रवाई कीती जाग। इस मौके पर बोलदे होई उनें गलाया।

<><><><><><>

PM-Defence-Min

रक्षा मंत्री राजनाथ सिंह होरें अज्ज प्रधानमंत्री नरेंद्र मोदी हुंदे कन्नै उन्दे घर जाइयै मलाटी कीती। एहू बैठक करीब 40 मिनटें तगर चली। एहू बैठक पहलगाम आतंकवादी हमले ते ओदे मगरा दी स्थिति गी लेइयै होई ऐ। कल चीफ ऑफ डिफेंस स्टॉफ जनरल अनिल चौहान होरें राजनाथ सिंह हुंदे कन्नै मलाटी कीती ते सैन्य कार्रवाई सरबन्धी केई मामलें पर चर्चा कीती। जनरल चौहान होरें रक्षा मंत्री होरें गी सैन्य रणनीति ते आतंकवाद दे खात्मे लेई कीती जा रदी तैयारिएं बारै दस्सेआ।

<><><><><><>

Army Firing LoC

पाकिस्तानी फौज नै जंदी रातीं कुपवाड़ा ते पुंछ जिलें च कब्जा रेखा पर बिजन इश्तेयाल दे लौहके थेआरें कन्नै गोलीबारी कीती। रक्षा मैहकमे दे जन संपर्क अधिकारी होरें इस गल्लै दी तस्दीक कीती ऐ जे भारती बलें तुरत ते तगड़ेयाई कन्नै इस कार्रवाई दा परता दित्ता। ध्यानजोग ऐ जे पाकिस्तान आसेआ जम्मू-कश्मीर च कब्जा रेखा पर बार-बार संघर्ष विराम दी खलाफवर्जी कीती जा'रदी ऐ। रक्षा सूत्तरें दस्सेआ ऐ जे पाकिस्तानी चौकिएं थमां बिजन भड़कावे दे कीती जा'रदी गोलीबारी दा भारती फौज बनकदा जोआब देआ करदी ऐ।

<><><><><><>

School-Timings

जम्मू दे स्कूली शिक्षा निदेशालय आसेआ जम्मू संभाग दे समर जोन आहले स्कूलें दे समें च बदलाव दी घोषणा कीती गेई ऐ। आकाशवाणी दे जम्मू संवाददाता दी जानकारी मूजब जारी कीते गेदे इक हुकमै मूजब 12मीं जमात तगर दे सब्बनें सरकारी ते प्राइवेट स्कूल हून बडुलै 8 बजे शा लेइयै दपैहरी 2 बजे तगर लगगडन। नमीं समें-सारणी पैहली मई 2025 थमां लेइयै 30 सितंबर 2025 तगर लागू रौहग।

<><><><><><>

Weather

मौसम विभाग नै जम्मू-कश्मीर च अज्जै थमां लेइयै औंदे किश दिनें तगर मौसम दे खुश्क रौहने ते प्रदेश दी कई थाहरें पर लूट चलने दी भविक्खणी कीती ऐ। मैहकमे दा आखना ऐ जे अज्जै थमां लेइयै पैहली मई तगर मौसम आमतौरा पर खुश्क रौहग ते 2 ते 3 मई गी किश-किश थाहरें पर हल्की बरखा ते गरज-चमक दी संभावना ऐ। उआं औंदे किश दिनें च जम्मू संभाग च लूट चलने दे असार जताए गेन। तोआई, जम्मू-श्रीनगर राश्ट्री जरनैली शिड़कै एन.एच-44 पर गड्डियें दी आओजाई अज्ज ब्हाल करी दित्ती गेई। शिड़कै गी इक दिनै लेई रामबन च मरम्मती कम्मे दे चलदे बंद रक्खेआ गेआ हा। अज्ज बडुलै 8 बजे मगरा जम्मू थमां श्रीनगर लेई छड़ा इक बक्खी दा गड्डियें गी आओजाई लेई इजाजत दित्ती गेई ही। जिस्सलै के मुगल रोड़ पर गड्डियें दी आओजाई लेई खुल्ल ऐ।



Handicrafts-Awards

कपड़ा मंत्रालय दे दस्तकारिएं सरबंधी विभाग दे विकास कमिशनर हुं'दे दफ्तरै बड़ी मती प्रतिश्ठा आहले राश्ट्री दस्तकारी अवार्ड 2024 लेई आवेदन मंगे न। 30एं ब'रें तगर दी उम्री दे कारीगर ते घटोघट्ट 10एं ब'रें दे तजुबे आहले एहदे शा मती उम्री दे कारीगर बी इस राश्ट्री अवार्ड लेई आवेदन करी सकदे न। इसै चालली 20एं ब'रें तगर दे तजुबे आहले ओकड़े कारीगर जिं'दी उम्र 50एं ब'रें शा मती ऐ, ओहू शिल्प गुरू अवार्ड लेई आवेदन करी सकडन। मंत्रालय आसेआ कुल 25 पुरस्कार भेंट कीते जाडन जिं'दे चा 6 शिल्प गुरू अवार्ड ते 19 राश्ट्री अवार्ड होडन। आवेदन जमा करोआने दी खीरी तरीक 12 मई ऐ। इच्छुक कारीगर, एहदे लेई अखनूर रोड जम्मू च स्थित हैंडीक्राफ्ट सर्विस सेंटर कन्नै राबता करी सकदे न जां फही वैबसाईट www.handicrafts.gov.in पर जाइयै मती जानकारी लेई सकदे न। योग्यता मानदंड, दिशा निर्देश ते होर दुए ब्यौरे इस वैबसाईट उप्पर उपलब्ध न।



Waves

विश्व ऑडियो विजुअल ते मनोरंजन शिखर सम्मेलन वेक्स 2025 पैहली थमां 4 मई तोहड़ी मुम्बई च आयोजित होग। शिखर सम्मेलन च भारत मंडप च देसै दी विरासत ते वैश्विक मीडिया ते मनोरंजन देबधदे प्रभाऽ दा प्रदर्शन होग। 'कला से कोड' विशे पर आधारित इस मंडप च भारत दी वसुधैव कुटुम्बकम् यानि दुनिया इक्क परौआर ऐ दी भावना प्रदर्शित होग। एहदे च एहू दस्सेआ जाग जे कियां देसै दी कलात्मक परम्परा लम्में समें थमां रचनात्मक, सद्भाव ते सांस्कृतिक कूटनीति दा प्रतीक रेइयां न। इत्थे चार खेत्तर आम लोकें गी भारती कहानी सुनाने दी परम्पराएं कन्नै अवगत करोआडन। भारत मंडप मीडिया ते मनोरंजन खेत्तर दे रचनाकारें, सहयोगियें ते परिवर्तन करने आहलें लेई इक गतिशील मंच ऐ। एहू बक्ख-बक्ख सरबंधत धड़ें गी भारत दी असाधारण प्रतिभा, उन्नत तकनीकें ते तेजी कन्नै धदे बजार दी समर्थ कन्नै जुड़ने दा इक महत्वपूर्ण मौका उपलब्ध करोआग। भारत मंडप

सांस्कृतिक विरासत दे प्रदर्शन दे अलावा बन्न-सबन्नी सांस्कृतिक भागीदारी ते निवेश गी बढ़ावा देने च मजबूत
सरकारी सहयोग दा बी प्रतीक होगा।

<><><><><><>